



Broj: 01-50-1-15-41/08  
Sarajevo, 3.12. 2008. godina

**ZAPISNIK  
41. sjednice Predstavničkog doma  
Parlamentarne skupštine Bosne i Hercegovine,  
održane 3. 12. 2008. godine**

Sjednica počela u 10,10 sati. Prisustvovalo je 39 poslanika. Opravdano su odsustvovali: Sead Jamakosmanović, Jovan Todorović i Savo Erić.

Iz Vijeća ministara BiH sjednici su prisustvovali: ministri Tarik Sadović, Bariša Čolak i Božo Ljubić, te zamjenik ministra Vilim Primorac.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, NATO-a, EUPM-a, američke i britanske ambasade, te nevladine organizacije Centri civilnih inicijativa.

U okviru prethodnih pitanja predsjedavajući Doma Niko Lozančić obavijestio je Dom o pitanjima o kojima je u Kolegiju kao komisiji postignuta saglasnost, nakon što na 39. i 40. sjednici nisu dobila entitetsku većinu. U Kolegiju kao komisiji postignuta je saglasnost o:

- Odluci Doma za razmatranje Prijedloga zakona o izmjeni Zakona o državnoj službi u institucijama BiH po skraćenom postupku, u skladu s članom 126. Poslovnika;
- prijedlogu zaključka poslanika Huseina Nanića povodom rasprave o prijedlogu zaključaka Komisije za saobraćaj i komunikacije;
- inicijativi poslanika Branka Dokića u vezi sa izlaganjem predsjedavajućeg Predsjedništva BiH Harisa Silajdžića prilikom obraćanja Generalnoj skupštini UN-a u Njujorku i Parlamentarnoj skupštini Vijeća Evrope u Strazburu;
- finansijskim izvještajima RTVBiH, na dan 31.12.2007., s mišljenjem ovlaštenog revizora i
- zahtjevu poslanika Bajazira Jašarevića za razmatranje Prijedloga zakona o izmjenama Zakona o javnim nabavkama BiH po hitnom postupku, u skladu s članom 127. Poslovnika.

Predsjedavajući je naglasio da o ovim pitanjima obavještava Dom u skladu s članom čl 80. stav (2) i konstatirao da su usvojeni akti o kojima je postignuta saglasnost.

Dalje je predsjedavajući iznio izmjene i dopune prijedloga dnevnog reda koji su poslanici dobili u pozivu za sjednicu. Izvršene su sljedeće izmjene i dopune:

- u dnevni red uvršten je Prijedlog zakona o izmjenama Zakona o javnim nabavkama BiH (predlagač: poslanik Bajazit Jašarević) radi rasprave i glasanja o Prijedlogu zakona, s obzirom da je usaglašavanjem u Kolegiju kao komisiji usvojen zahtjev za hitni postupak;
- dnevni red dopunjen je još uvrštavanjem Izvještaja komisije Kolegija o nastojanju za postizanje saglasnosti o Mišljenju Komisije za finansije i budžet povodom razmatranja finansijskih izvještaja RTVBiH;
- iz 15. tačke prijedloga dnevnog reda isključen je zaključak poslanika Huseina Nanića, budući da je o ovom zaključku postignuta saglasnost i time je usvojen;
- skinuta je 6. tačka prijedloga dnevnog reda – Prijedlog zakona o Agenciji za razvoj informacionog društva BiH (drugo čitanje) na zahtjev nadležne komisije da se uvrsti u dnevni red naredne sjednice i
- preformulirana je 11. tačka u vezi s informativnom sjednicom Ustavnopravne komisije o problemu organiziranog kriminala i korupcije.

Poslije iznošenja izmjena i dopuna prijedloga dnevnog reda, predsjedavajući je otvorio raspravu.

U okviru rasprave o prijedlogu dnevnog reda izneseni su sljedeći prijedlozi:

**Sadik Bahtić** iznio je inicijativu da se za narednu sjednicu ovog doma uvrsti tačka pod nazivom: “Globalna finansijska kriza, njeni negativni efekti na ekonomiju BiH i mjere za prevazilaženje krize.”

**Denis Bećirović** predložio je da se u dnevni red 41. sjednice uvrsti tačka: Razmatranje posljedica Nacrta zakona o teritorijalnoj organizaciji RS-a, kojim se u preostale dvije općine Bosanska Kostajnica i Bosanski Brod navedenog entiteta ukida pridjev bosanski. Nakon što je dao obrazloženje, rekao je da, zbog obimnog dnevnog reda, Kolegiju ostavlja mogućnost da ovu tačku predvidi za dnevni red naredne sjednice Doma.

O prijedlozima Bahtića i Bećirovića vođena je duža polemična rasprava. U raspravi i replikama učestvovali su: Drago Kalabić, Momčilo Novaković, Denis Bećirović, Rifat Dolić, Sadik Bahtić, Milorad Živković, Bakir Izetbegović i Milica Marković.

Nakon ove rasprave, predsjedavajući Lozančić dao je pauzu i pozvao članove Proširenog kolegija na sastanak.

Poslije pauze, predsjedavajući je informirao Dom da je Prošireni kolegij zaključio da zamoli sve poslanike da odustanu od najavljenih replika. Konstatirao je da do sada nema konkretnih prijedloga za dopunu dnevnog reda ove sjednice, već da su podnesene dvije inicijative. Podsjetio je da su pod 2. tačkom dnevnog reda “Poslanička pitanja i odgovori” i da svaki poslanik ima mogućnost postaviti pitanje i podnijeti inicijativu, a da se, prema Poslovniku, u okviru rasprave o prijedlogu dnevnog reda mogu podnositi samo prijedlozi za izmjene i dopune dnevnog reda ove 41. sjednice.

Mirjana Malić iznijela je intervenciju da se u tački 10. navede da je predlagač Zakona o fiskalnim kasama Jozo Križanović.

Predsjedavajući je uvažio ovu primjedbu i konstatirao da je to tehnička greška i da će biti ispravljena već prilikom konstatacije dnevnog reda.

Zatim je predsjedavajući Lozančić konstatirao da 41. sjednica Doma ima sljedeći

#### D N E V N I R E D

1. Usvajanje zapisnika 39. i 40. sjednice Predstavničkog doma;
2. Poslanička pitanja i odgovori;
3. Prijedlog poslanika Jerka Ivankovića Lijanovića, Hadži Jovana Mitrovića i Sefera Halilovića za glasanje o nepovjerenju Vijeću ministara BiH;
4. Razmatranje Rezolucije Evropskog parlamenta o Bosni i Hercegovini, usvojenoj na plenarnoj sjednici, održanoj 23.10.2008. u Strazburu (prijedlog poslanika Denisa Bećirovića sa 40. sjednice Doma, održane 19.11.2008.);
5. Zahtjev poslanika Sadika Bahtića za razmatranje Prijedloga zakona o državnoj imovini Bosne i Hercegovine po skraćenom postupku, u skladu s članom 126. Poslovnika;
6. Prijedlog zakona o izmjenama Zakona o javnim nabavkama BiH, rasprava u skladu s članom 127. Poslovnika (predlagač: poslanik Bajazit Jašarević);
7. Prijedlog zakona o zrakoplovstvu BiH (prvo čitanje);
8. Prijedlog zakona o Agenciji za pružanje usluga u zračnoj plovidbi BiH (prvo čitanje);
9. Prijedlog zakona o dopuni Zakona o Javnom radiotelevizijskom sistemu BiH (prvo čitanje);
10. Prijedlog zakona o fiskalnim kasama, predlagač: poslanik Jozo Križanović, prvo čitanje;
11. Razmatranje Izvještaja Ustavnopravne komisije o održanoj informativnoj sjednici o problemu organiziranog kriminala i korupcije, s prijedlogom zaključaka, te:
  - a) Analize stepena primjene Strategije BiH za borbu protiv organiziranog kriminala i korupcije (podnosilac materijala: Ministarstvo sigurnosti BiH),
  - b) Izvještaja, mišljenja i zaključaka o pitanjima korupcije i organiziranog kriminala (podnosilac: Ministarstvo pravde BiH);
12. Izvještaj komisije Kolegija o nastojanju za postizanje saglasnosti o Prijedlogu zakona o programu zaštite svjedoka u BiH (zakon u drugom čitanju);
13. Izvještaj komisije Kolegija o nastojanju za postizanje saglasnosti o Prijedlogu zakona o dopunama Zakona o izmirenju obaveza po osnovu računa stare devizne štednje, predlagač: Vijeće ministara BiH (zakon u drugom čitanju);

14. Izvještaj komisije Kolegija o nastojanju za postizanje saglasnosti o zahtjevu poslanika Azre Hadžiahmetović za razmatranje Prijedloga zakona o izmjeni Zakona o plaćama i naknadama zaposlenih u institucijama BiH po hitnom postupku, u skladu s članom 127. Poslovnika;
15. Izvještaj komisije Kolegija o nastojanju za postizanje saglasnosti o:
  - Prijedlogu zaključaka 5. i 6. Komisije za saobraćaj i komunikacije povodom rasprave o Tački: Aktuelna situacija u Radioteleviziji BiH i provođenje reforme Javnog RTV sistema u Bosni i Hercegovini“;
  - Prijedlogu zaključaka poslanika Drage Kalabića i Joze Križanovića povodom rasprave o prijedlogu zaključaka Komisije za saobraćaj i komunikacije;
16. Izvještaj komisije Kolegija o nastojanju za postizanje saglasnosti o Mišljenju Komisije za finansije i budžet povodom razmatranja Finansijskih izvještaja Radiotelevizije BiH;
17. Izvještaj komisije Kolegija o nastojanju za postizanje saglasnosti o Prijedlogu zaključka poslanika Momčila Novakovića povodom razmatranja Informacije o aktuelnoj sigurnosnoj situaciji u BiH s posebnim osvrtom na terorizam;
18. Izvještaj komisije Kolegija o nastojanju za postizanje saglasnosti o Prijedlogu zaključaka Kluba SDA povodom rasprave o Analizi stanja u Projektu CIPS, s posebnim osvrtom na izdavanje lažnih dokumenata;
19. Prijedlog zaključka o izradi plana aktivnosti na rješavanju smještaja institucija Bosne i Hercegovine (prijedlog poslanika Huseina Nanića sa 40. sjednice, održane 19.11.2008.).

Poslije konstatiranja dnevnog reda, za riječ se javio Denis Bećirović i zatražio da se razjasni pitanje njegovog prijedloga. Rekao je da je on predložio tačku za ovu sjednicu, a da je ostavio mogućnost uvrštavanja i u dnevni red naredne sjednice, pa je pitao hoće li ova tačka biti u dnevnom redu ove ili naredne sjednice, dodavši da se to na sjednicama radilo u nekoliko slučajeva do sada.

Predsjedavajući Lozančić odgovorio je da Bećirovićev prijedlog sigurno neće biti u dnevnom redu ove sjednice, jer je već utvrđen dnevni red, a poslovnički će biti procesuirana njegova inicijativa za uvrštavanje u dnevni red naredne sjednice, u skladu s njegovim zahtjevom na današnjoj sjednici.

Poslije ovog razjašnjenja, predsjedavajući je otvorio raspravu o zapisnicima.

#### **Ad. 1. Usvajanje zapisnika 39. i 40. sjednice Predstavničkog doma**

O zapisnicima je vođena jedinstvena rasprava.

Jozo Križanović iznio je primjedbu da postoji tehnička greška u okviru 13. tačke, prilikom navođenja rezultata glasanja o prijedlogu njegovog zaključka, gdje zbir glasova "za" nije tačan ("za" glasalo 16 – iz Federacije BiH 13, iz RS dva), pa da to treba ispraviti.

Predsjedavajući je rekao da će se uvidom u transkript otkloniti ova greška.

Križanović je također prigovorio na Zapisnik 40. sjednice u dijelu gdje se navode izvodi iz diskusija o Izvještaju Zajedničke komisije za usaglašavanje prijedloga za imenovanje ombudsmena u Instituciju ombudsmena za ljudska prava BiH. Rekao je da je samo jednom rečenicom rečeno da su Jozo Križanović i Sefer Halilović podržali izlaganje Martina Raguža, te da je to nekorektno navedeno i da mu se čini da se radi o nejednakom tretiranju učesnika u raspravi.

Predsjedavajući Lozančić prihvatio je primjedbu Križanovića i podsjetio da je Domu zaključio da se ravnopravno tretiraju izlaganja svih poslanika.<sup>1</sup>

<sup>1</sup> U Zapisniku 39. sjednice ispravljena je greška. Zapisnik 40. sjednice dopunjen je sljedećim tekstom: „Jozo Križanović je u svojoj kratkoj diskusiji rekao: „Ja ću vrlo kratko, zapravo mogu samo reći da se u potpunosti slažem s ovim što je govorio kolega Raguž. Dakle, bio bi ovo presedan da zajedničke komisije domova usaglašavaju personalna rješenja, odnosno imenovanja. Mislim da to nije u skladu s našim poslovníkom i ja ću iz tog razloga biti protiv ovakvih prijedloga i protiv zaključka.“

Sefer Halilović je, također u kratkoj diskusiji, rekao da bi samo htio podržati ovo što su već prije njega govorili Raguž i ostali poslanici. Dodao je da je više nego očigledno da procedure nisu poštovane i da će se doći u poziciju kada će se do ombudsmena doći na sudu, a to će nas udaljiti pola godine ili godinu dana od konačnog rješenja ovog pitanja.“

Prilikom glasanja, sa 32 glasa "za" (Federacija BiH 21, RS 11) i jednim "suzdržanim", usvojeni su zapisnici 39. i 40. sjednice, s primjedbama Joze Križanovića.

## **Ad. 2. Poslanička pitanja i odgovori**

Predsjedavajući Lozančić konstatirao je da su od prošle do ove sjednice Doma odgovore na pitanja dobili poslanici:

- Milorad Živković – od Vijeća ministara BiH, na pitanje postavljeno na 35. sjednici,
- Niko Lozančić – od Državne agencije za istrage i zaštitu, na pitanje postavljeno na 36. sjednici,
- Velimir Jukić – od Državne agencije za istrage i zaštitu, na pitanje postavljeno na 38. sjednici i
- Husein Nanić i Šemsudin Mehmedović – od Ministarstva komunikacija i prometa, na pitanja postavljena na 38 sjednici.
- Jozo Križanović je od Zajedničke službe Parlamentarne skupštine BiH dobio dio odgovora na pitanja postavljena na 39. sjednici i
- Husein Nanić – od Kolegija Sekretarijata, na pitanje postavljeno na 39. sjednici.

Odgovore su komentirali: Šemsudin Mehmedović, Milorad Živković i Jozo Križanović.  
Postavljena su nova poslanička pitanja kako slijedi:

### **Milorad Živković:**

Izrazio je nezadovoljstvo odgovorom Ministarstva vanjskih poslova BiH na pitanje postavljeno na 35. sjednici, održanoj 24. septembra 2008., i ponovio pitanje:

– Da li će uopće biti razmatran ATA Carnet sporazum? Tako da tražim ponovo odgovor.“

### **Jozo Križanović:**

„Nisam zadovoljan dijelom odgovora naših službi kada je u pitanju rješavanje problema ozvučenja i tražim ukoliko je moguće da se tehničke službe izjasne – Mogu li ovo bolje riješiti?“

Postavljena su nova poslanička pitanja kako slijedi:

### **Milorad Živković:**

„Kada se planira uputiti u skupštinsku proceduru na davanje saglasnosti za ratifikaciju Konvencija o pravima lica s invaliditetom?“

### **Sadik Bahtić:**

„Tražim od nadležnih institucija, mislim na OSA-u i SIPA-u, da ispituju navodne prijetnje pojedinim političarima. Mislim na one prijetnje Tihiću i Kebi.“

### **Rifat Dolić:**

„1. Pitanje je upućeno ministru pravde u Vijeću ministara BiH gospodinu Bariši Čolaku: Čime se rukovodio Kantonalni sud u Bihaću kada je u tri navrata poništio rješenja Općinskog suda u Bihaću i nakon već jedne prethodne odgode još u dva navrata svojim rješenjem izvršio odgodu izvršenja kazne zatvora za osuđenog Hamdiju Abdića, zvanog Tigar iz Bihaća, koji je, 19.11.2007., primio uputni akt Suda u Bihaću za izdržavanje kazne zatvora u trajanju od dvije godine i do danas se nalazi na slobodi zahvaljujući samo svojim jatacima u Kantonalnom sudu u Bihaću?“

Šta su pravosuđe i nadležne institucije BiH preduzeli naspram činjenice da se osuđeni za ista krivična djela Emin Pivić, također iz Bihaća, već više od godinu dana ne javlja na izdržavanje kazne zatvora, već je navodno u bjekstvu iako je javna tajna da je policiji i sudovima u Bihaću poznata adresa njegovog boravka?

2. Drugo moje pitanje je prijava putem poslaničke inicijative Visokom sudskom i tužilačkom vijeću BiH. Molim da Visoko sudsko i tužilačko vijeće BiH, u skladu s važećim propisima, provede

istragu o okolnostima u kojima je u konkretnim slučajevima Kantonalni sud u Bihaću u tri navrata poništavao rješenje općinskog suda i odgodio izdržavanje zatvorske kazne za Hamdiju Abdića, zvanog Tigar, i da u slučaju opravdanosti preduzme zakonom predviđene mjere.“

#### **Slavko Jovičić:**

„U skladu s članom 8. Poslovnika Predstavničkog doma Parlamentarne skupštine BiH, upućujem poslaničku inicijativu za zakazivanje posebne sjednice oba doma Parlamentarne skupštine BiH sa samo jednom tačkom dnevnog reda: **Privredna i ekonomska situacija u BiH, odnosno ekonomska recesija i kolaps bankarskog sistema u mnogim državama svijeta i Evrope i refleksije tog stanja na BiH, odnosno na privredu i ukupno ekonomsko stanje u ovoj zemlji.**“

Predsjedavajući Lozančić odgovorio je da je inicijativa već procesuirana.

#### **Lazar Prodanović:**

„1. Zbog čega još uvijek Predsjedništvo BiH nije imenovalo predstavnika Bosne i Hercegovine u Venecijanskoj komisiji, iako je sadašnjem istekao mandat prije tri godine i na taj način i dalje nelegitimno predstavlja BiH? Kada će i na koji način biti izabran novi član? (...) Podsjećam na član 175. Poslovnika Doma koji glasi: U nadležnosti organa BiH koji provode procedure imenovanja predstavnika BiH za članstvo u međunarodnim institucijama prilikom izrade lista za članstvo dužni su obaviti konsultacije u Domu. Dakle, hoće li biti konsultacija i kada? “

2. Kada će novoimenovani ambasador BiH u Švicarskoj Konfederaciji u Bernu N.J.E. Jakob Finci preuzeti dužnost? ... Da li je njemu značajnija pozicija direktora Agencije za državnu službu u kojoj još uvijek vuče konce, uključujući i to da predlaže ko će ga zamijeniti i ko će biti direktor i niz još značajnih funkcija koje obavlja u ovoj državi ili da bude najznačajniji predstavnik naše zemlje u ovoj zemlji? Koji su razlozi zbog čega Jakob Finci još uvijek nije preuzeo dužnost ambasadora u Bernu?“

#### **Azra Hadžiahmetović:**

„Kada (konkretno - dan, mjesec i godina) će dostaviti Parlamentarnoj skupštini BiH Akcioni plan za realizaciju obaveza koje proizilaze iz potpisanog Sporazuma o stabilizaciji i pridruživanju?“

#### **Adem Huskić:**

„Koliko ukupno lica, po pojedinim ministarstvima u Vijeću ministara BiH, radi po ugovoru o djelu i koji su razlozi za ovakvu praksu?“

### **Ad. 3. Prijedlog poslanika Jerka Ivankovića Lijanovića, Hadži Jovana Mitrovića i Sefera Halilovića za glasanje o nepovjerenju Vijeću ministara BiH**

U uvodnim napomenama predsjedavajući Lozančić rekao je da je prijedlog iz ove tačke odmah nakon prijema uputio poslanicima, Vijeću ministara BiH i Domu naroda, u skladu s Poslovníkom Doma. Rekao je da je Vijeće ministara BiH dostavilo obavještenje da se upoznao s prijedlogom za glasanje o nepovjerenju na 66. sjednici, održanoj 13. 11. 2008., a da Vijeće ministara BiH nije dostavilo drugo izjašnjenje. Podsjetio je na član 146. st. (1) i (2) Poslovnika, prema kojima, svaki predlagač ima pravo podnijeti Domu obrazloženje, kao i da Vijeće ministara BiH ima pravo iznijeti svoj stav, nakon čega se otvara opća rasprava.

U svojstvu predlagača, govorili su: Hadži Jovan Mitrović, Jerko Ivanković Lijanović i Sefer Halilović.

U raspravi su učestvovali: Zlatko Lagumdžija, Rifat Dolić, Denis Bećirović, Momčilo Novaković, Jozo Križanović, Mirko Okolić i Jerko Ivanković Lijanović.

Prilikom glasanja, Dom nije uskratio povjerenje Vijeću ministara BiH. "Za" prijedlog glasalo je sedam, "protiv" 23, "suzdržao" se jedan poslanik.

**Ad. 4. Razmatranje Rezolucije Evropskog parlamenta o Bosni i Hercegovini, usvojenoj na plenarnoj sjednici, 23.10.2008. u Strazburu (prijedlog poslanika Denisa Bećirovića sa 40. sjednice Doma, održane 19.11.2008.)**

Predsjedavajući Lozančić podsjetio je da je ova tačka u dnevni red uvrštena na inicijativu poslanika Denisa Bećirovića.

Denis Bećirović obrazložio je svoju inicijativu.

U raspravi su učestvovali: Remzija Kadrić, Martin Raguž, Selim Bešliagić, Milica Marković, Denis Bećirović, Vinko Zorić, Drago Kalabić, Lazar Prodanović, Sadik Ahmetović, Ekrem Ajanović, Milorad Živković, Halid Genjac, Beriz Belkić, Hadži Jovan Mitrović, Momčilo Novaković, Azra Hadžiahmetović, Husein Nanić, Jozo Križanović, Mirko Okolić i Bakir Izetbegović.

Prilikom glasanja, predsjedavajući je obavijestio poslanike da je u pauzi Prošireni kolegij razmatrao zaključke koje su u raspravi podnijeli Denis Bećirović, Halid Genjac, Martin Raguž i Remzija Kadrić. Iznio je prijedlog Proširenog kolegija da se usvoji sljedeći zaključak:

- 1. Predstavnički dom Parlamentarne skupštine BiH prima k znanju Rezoluciju Evropskog parlamenta o BiH, usvojenu na plenarnoj sjednici, održanoj 23.10.2008., u Strazburu.**
- 2. Zadužuje se Vijeće ministara BiH da Predstavničkom domu dostavi Akcioni plan o provođenju Sporazuma o stabilizaciji i pridruživanju najkasnije u roku od sedam dana, nakon čega će Predstavnički dom, poslije obavljene rasprave, donijeti svoj program rada u vezi s ovim pitanjima.**

Zatim je pitao predlagачe zaključaka da li odustaju od svojih prijedloga. Svi su odustali.

Sa 32 glasa "za" (iz Federacije BiH 21, iz RS 11), usvojen je navedeni zaključak koji je predložio Prošireni kolegij.

**Ad. 5. Zahtjev poslanika Sadika Bahtića za razmatranje Prijedloga zakona o državnoj imovini Bosne i Hercegovine po skraćenom postupku, u skladu s članom 126. Poslovnika**

Poslije kraćih uvodnih napomena predsjedavajućeg, Sadik Bahtić obrazložio je svoj zahtjev i potrebu za njegovom donošenjem.

U raspravi su učestvovali: Momčilo Novaković, Remzija Kadrić, Rifat Dolić, Sadik Bahtić i Sadik Ahmetović.

Prilikom glasanja, zahtjev za proceduru nije dobio entitetsku podršku. "Za" je glasao 21 (Federacija BiH 17, RS četitri), "protiv" osam, "suzdržala" su se četiri poslanika.

Predsjedavajući je konstatirao da će se o zahtjevu za skraćenu proceduru naknadno provesti usklađavanje u Kolegiju kao komisiji.

**Ad. 6. Prijedlog zakona o izmjenama Zakona o javnim nabavkama BiH, rasprava u skladu s članom 127. Poslovnika (predlagач: poslanik Bajazit Jašarević)**

U uvodnim napomenama predsjedavajući je podsjetio da je postizanjem saglasnosti u Kolegiju kao komisiji usvojen zahtjev poslanika Bajazita Jašarevića za hitni postupak. Zatim je Prijedlog zakona dao na glasanje.

Zakon je usvojen sa 33 glasa "za" (Federacija BiH 23, RS deset), tri poslanika bila su "suzdržana".

**Ad.7. Prijedlog zakona o zrakoplovstvu BiH (prvo čitanje)****Ad. 8. Prijedlog zakona o Agenciji za pružanje usluga u zračnoj plovidbi BiH (prvo čitanje)**

Predsjedavajući Lozančić dao je osnovne uvodne napomene.

Prihvaćen je prijedlog predsjedavajućeg da se objedini rasprava o ovim prijedlozima zakona.

Ministar saobraćaja i komunikacija BiH Božo Ljubić podnio je Domu obrazloženje prijedloga zakona iz 7. i 8. tačke.

U raspravi su učestvovali: Momčilo Novaković, Milorad Živković, Branko Dokić i Azra Hadžiahmetović. Na pitanja iz rasprave odgovorio je ministar Božo Ljubić.

Prilikom glasanja usvojeni su prijedlozi zakona u prvom čitanju, i to:

- Prijedlog zakona o zrakoplovstvu - sa 32 glasa "za" (Federacija BiH 24, RS osam) i tri "suzdržana" i
- Prijedlog zakona o Agenciji za pružanje usluga u zračnoj plovidbi BiH – sa 32 glasa "za" (Federacija BiH 23, RS devet) i tri "suzdržana".

**Ad. 9. Prijedlog zakona o dopuni Zakona o Javnom radiotelevizijskom sistemu BiH,prvo čitanje**

U uvodnim napomenama predsjedavajući Lozančić podsjetio je na Mišljenje nadležne Komisije za saobraćaj i komunikacije i prijedlog Komisije da se prijedlog zakona iz ove tačke razmatra i u drugom čitanju, bez razmatranja u drugoj komisijskoj fazi.

Ministar Božo Ljubić podnio je Domu kratko obrazloženje.

U raspravi su učestvovali Mirko Okolić i Branko Dokić.

Prilikom glasanja, Dom je, sa 34 glasa "za" (Federacija BiH 25, RS devet) i dva "suzdržana", usvojio Prijedlog zakona iz ove tačke u prvom čitanju.

Prijedlog Komisije da se odmah pređe i u drugo čitanje nije dobio entietsku većinu. "Za" je glasalo 19 (Federacija BiH 17, RS dva), "protiv" 12, "suzdržalo" se pet poslanika.

Predsjedavajući je konstatirao da će se o prijedlogu Komisije za čitanje naknadno provesti usaglašavanje u Kolegiju kao komisiji.

**Ad .10. Prijedlog zakona o fiskalnim kasama, predlađač: poslanik Jozo Križanović, prvo čitanje**

Predsjedavajući je dao uvodne napomene.

Nije bilo rasprave.

Prijedlog zakona usvojen je u prvom čitanju sa 27 glasova "za" (Federacija BiH 22, RS pet), šest "protiv", "suzdržana" su bila tri poslanika.

**Ad. 11. Razmatranje Izvještaja Ustavnopravne komisije o održanoj informativnoj**

**sjednici o problemu organiziranog kriminala i korupcije, s prijedlogom zaključaka, te:**

- a) Analize stepena provođenja Strategije BiH za borbu protiv organiziranog kriminala i korupcije (podnosilac materijala: Ministarstvo sigurnosti BiH),**
- b) Izvještaja, mišljenja i zaključaka o pitanjima korupcije i organiziranog kriminala (podnosilac: Ministarstvo pravde BiH)**

U uvodnim napomenama predsjedavajući je podsjetio da je Ustavnopravna komisija, na prijedlog Kolegija Doma, od 10.6. 2008., organizirala informativnu sjednicu o problemu organiziranog kriminala i korupcije. Podsjetio je na zaključke Komisije, kao i na zaključke koje Ministarstvo pravde BiH predlaže u svom materijalu.

U odsustvu predsjedavajućeg Ustavnopravne komisije u ovom dijelu sjednice, Martin Raguž je, svojstvu zamjenika predsjedavajućeg Komisije, obrazložio Izvještaj i zaključke koje Komisija predlaže Domu.

U raspravi su učestvovali: Slavko Jovičić, Denis Bećirović, Martin Raguž, Salko Sokolović, Lazar Prodanović, Jozo Križanović, Šefik Džaferović, Hadži Jovan Mitrović i Azra Alajebegović. U ime Ministarstva sigurnosti BiH govorio je ministar Tarik Sadović.

Prilikom glasanja, sa 28 glasova "za" (Federacija BiH 18, RS 10), četiri "protiv" i četiri "suzdržana", Dom je usvojio zaključke koje je predložila Ustavnopravna komisija, osim zaključka pod br. 12. koji je nepotreban. To su sljedeći zaključci:

1. Predstavnički dom ističe ozbiljnost situacije u kojoj se nalazi Bosna i Hercegovina kada je u pitanju korupcija i organizirani kriminal. Uz sve pozitivno što je učinjeno, stanje u ovoj oblasti zahtijeva strateški pristup na nivou Bosne i Hercegovine i koordinaciju i odgovornost svih.
2. Primaju se na znanje dokumenti koje su dostavili Ministarstvo sigurnosti BiH i Ministarstvo pravde BiH o pitanjima korupcije i organiziranog kriminala i podržava prijedlog preporuka i zaključaka sadržanih u njima.
3. Predstavnički dom konstatira da iz ovih informacija proizilazi da tamo gdje postoji sistemski i društveno organiziran pristup u borbi protiv korupcije i organiziranog kriminala - ima i rezultata, a tamo gdje takvog pristupa nema, takvi rezultati izostaju.
4. Predstavnički dom smatra da je u Bosni i Hercegovini potrebno jačati institucionalni okvir i kapacitet u borbi protiv korupcije.
5. Treba identificirati sektore u kojima su organizirani kriminal i korupcija izraženi i napraviti odgovarajuće akcione planove, tamo gdje oni ne postoje, za borbu protiv organiziranog kriminala i korupcije, što se posebno odnosi na javni sektor.
6. Predstavnički dom izražava nezadovoljstvo dosadašnjim stepenom provođenja Strategije za borbu protiv organiziranog kriminala i korupcije i zahtijeva da se ona provede do kraja. S obzirom da Vijeće ministara BiH nije uspostavilo koordinaciono tijelo, Dom zahtijeva da se, u roku od 30 dana, uspostavi koordinaciono tijelo za praćenje provođenja postojeće strategije, kao i da se, do isteka važnosti postojeće, donese nova strategija.
7. Sve obaveze iz ove oblasti, koje Bosna i Hercegovina ima prema međunarodnim tijelima čija je članica, kao i prema međunarodnim pravnim aktima, moraju se u potpunosti prihvatiti i provesti.
8. Predstavnički dom smatra da tim za praćenje realizacije materijalnog i procesnog krivičnog zakonodavstva treba da napravi analizu da li Bosna i Hercegovina ima dovoljan zakonski okvir za uspješnu borbu protiv organiziranog kriminala i korupcije. Ovo se posebno odnosi na oduzimanje protupravne imovinske koristi.
9. O svim preduzetim aktivnostima potrebno je upoznati najširu javnost Bosne i Hercegovine.
10. Potrebno je ostvariti saradnju s nadležnim institucijama zemalja u regionu.
11. Predstavnički dom smatra neophodnim uspostaviti odgovornosti svih koji rade na ovom poslu, nadzor nad njihovim radom, te povećati ukupan stepen odgovornosti u našem društvu kada su posrijedi ova pitanja.

Zatim je predsjedavajući proveo glasanje o prijedlogu zaključka koji je podnio Jozo Križanović, a koji glasi:

Uvažavajući značaj i težinu problema korupcije i organiziranog kriminala u BiH, zadužuje se Vijeće ministara BiH da uradi analizu provođenja Strategije BiH o borbi protiv korupcije i organiziranog kriminala i Predstavničkom domu dostavi:

- ocjene stanja,
- prioritete,
- potrebne izmjene u zakonodavstvu,
- kadrovsku strukturu,
- eventualno nedostajuća finansijska sredstva za efikasnije suzbijanje ovih krivičnih djela.

Rok za dostavljanje analize je 60 dana.

"Za" ovaj zaključak glasala su 22 poslanika (Federacija BiH 19, RS tri), "protiv" pet, "suzdržalo" se osam.

Zbog nedostatka entitetske većine, odmah je provedeno usaglašavanje u Kolegiju kao komisiji i nije bilo saglasnosti.

U drugom krugu glasanja "za" su glasala 23, "protiv" osam – iz Republike Srpske, "suzdržalo" se pet poslanika.



Predsjedavajući je konstatirao da je i ovaj zaključak usvojen jer je iz RS-a "protiv" glasalo manje od dvije trećine poslanika.

**Ad. 12. Izvještaj komisije Kolegija o nastojanju za postizanje saglasnosti o Prijedlogu zakona o programu zaštite svjedoka u BiH (zakon u drugom čitanju)**

Nije bilo rasprave.

Prilikom glasanja, predsjedavajući je iznio prijedlog Proširenog kolegija – da se odgodi izjašnjavanje o Izvještaju, a da se obavezuje Ministarstvo pravde BiH da, u saradnji s entitetskim i kantonalnim ministarstvima pravde, do naredne sjednice pokuša postići saglasnost o sponim pitanjima u Prijedlogu zakona i o tome obavijesti Dom.

Ovaj zaključak je usvojen sa 27 glasova "za" (Federacija BiH 17, RS 10), dva "protiv" i pet "suzdržanih".

**Ad. 13. Izvještaj komisije Kolegija o nastojanju za postizanje saglasnosti o Prijedlogu zakona o dopunama Zakona o izmirenju obaveza po osnovu računa stare devizne štednje, predlagač: Vijeće ministara BiH (zakon u drugom čitanju)**

Nije bilo rasprave.

U drugom krugu glasanja "za" Prijedlog zakona u drugom čitanju glasalo je 17, a "protiv" 18 poslanika.

Predsjedavajući je konstatirao da je odbijen Prijedlog zakona o dopunama Zakona o izmirenju obaveza po osnovu računa stare devizne štednje.

**Ad.14. Izvještaj komisije Kolegija o nastojanju za postizanje saglasnosti o zahtjevu poslanika Azre Hadžiahmetović za razmatranje Prijedloga zakona o izmjeni Zakona o plaćama i naknadama zaposlenih u institucijama BiH po hitnom postupku, u skladu s članom 127. Poslovnika**

Nije bilo rasprave.

Prilikom glasanja Dom je u drugom krugu, sa 26 glasova "za" (Federacija BiH 20, RS šest), tri "protiv" (iz RS dva) i sedam "suzdržanih", usvojio zahtjev za hitni postupak.

Odmah se prešlo na glasanje o Prijedlogu zakona. "Za" je glasalo 25 (Federacija BiH 23, RS dva), "protiv" devet i dva "suzdržana". Zbog nedostatka entitetske većine, odmah je provedeno usaglašavanje u Kolegiju i nije bilo saglasnosti.

U drugom krugu glasanja "za" je glasalo 25, "protiv" 10 – svi iz RS-a, "suzdržao" se jedan poslanik.

Predsjedavajući je konstatirao da je "protiv" Prijedloga zakona u drugom krugu iz RS-a glasalo dvije trećine poslanika i da je Prijedlog zakona odbijen.

**Ad .15. Izvještaj komisije Kolegija o nastojanju za postizanje saglasnosti o:**

- **Prijedlogu zaključaka 5. i 6. Komisije za saobraćaj i komunikacije povodom rasprave o Tački: Aktuelna situacija u Radioteleviziji Bosne i Hercegovine i provođenje reforme Javnog RTV sistema u Bosni i Hercegovini,**
- **Prijedlogu zaključaka poslanika Drage Kalabića i Jozе Križanovića povodom rasprave o prijedlogu zaključaka Komisije za saobraćaj i komunikacije**

Nije bilo rasprave.

U drugom krugu glasanja usvojeni su zaključci pod br. 5. i 6. iz Izvještaja Komisije za saobraćaj i komunikacije. "Za" je glasalo 16, "protiv" 13 – iz RS-a osam, "suzdržalo" se šest poslanika.

Prijedlog zaključaka Drage Kalabića nije usvojen – "za" glasalo 14, "protiv" 18, "suzdržala" se tri poslanika.

U drugom krugu prijedlog zaključka Jozе Križanovića je usvojen, jer je manje od dvije trećine iz entiteta glasalo "protiv". "Za" su glasala 22, "protiv" devet – svi iz RS-a, "suzdržala" su se četiri poslanika.

Prema tome, osim zaključaka koji su, na prijedlog Komisije za saobraćaj i komunikacije usvojeni na 39. sjednici i navedeni u Zapisniku 39. sjednice, nakon usaglašavanja u Kolegiju kao komisiji, na 41. sjednici usvojeni su i zaključci pod br. 5. i 6. Izvještaja Komisije, koji glase:

**“5. Komisija smatra da je u nelegalnoj proceduri donesena odluka Upravnog odbora BHRT-a o smjeni generalnog direktora Mehmeda Agovića na 32. sjednici Upravnog odbora, održanoj 12.9.2008. (Odluka br. 4110-37/91, od 15.9.2008.), zbog grubog kršenja procedure i principa vladavine prava, a time i Ustava BiH i Evropske konvencije o ljudskim pravima i međunarodnih ugovora, a što je potvrdio ombudsmen BiH u svojim preporukama od 29.9. 2008., te predlaže Predstavničkom domu da naloži Upravnom odboru postupanje u skladu s navedenim aktima. S tim u vezi, Komisija predlaže da Upravni odbor stavi van snage Odluku o imenovanju vršioca dužnosti generalnog direktora BHRT-a, broj: 4110-37/92, od 15.9.2008.**

**6. Komisija predlaže Predstavničkom domu Parlamentarne skupštine BiH da se utvrdi odgovornost članova Upravnog odbora BHRT-a zbog:**

- nepoštivanja Zakona o Javnom RTV servisu BiH, član 29. stav (1) tačke b), c), d), j) i k);
- kršenja procedura;
- nepoštivanja Ustava BiH i Evropske konvencije o ljudskim pravima i međunarodnog prava;
- neprovođenja zaključaka Predstavničkog doma Parlamentarne skupštine BiH sa 32. sjednice;
- kao i zbog ukupnog stanja u ovom javnom servisu.“

Takođe je, nakon usaglašavanja u Kolegiju kao komisiji, Dom usvojio zaključak koji je predložio Jozo Križanović, a koji glasi:

**Predstavnički dom podržava zaključke Komisije za saobraćaj i komunikacije, osim tačke 5, donesene povodom raprave o tački: Aktuelna situacija u Radioteleviziji Bosne i Hercegovine i provođenje reforme Javnog RTV sistema BiH. Rasprava o ovim zaključcima dodatno je ukazala na nezadovoljstvo Predstavničkog doma ukupnim stanjem u Javnom RTV servisu BiH, što ukazuje i na nesposobnost Upravnog odbora RTV servisa BiH da provede neophodne promjene s ciljem saniranja takvog stanja. Zbog svega toga, Predstavnički dom Parlamentarne skupštine BiH iskazuje nepovjerenje Upravnom odboru i pokreće postupak izbora novog Upravnog odbora u skladu sa Zakonom o Javnom RTV servisu BiH.**

#### **Ad.16. Izvještaj komisije Kolegija o nastojanju za postizanje saglasnosti o Mišljenju Komisije za finansije i budžet povodom razmatranja Finansijskih izvještaja Radiotelevizije BiH**

Nije bilo rasprave.

U drugom krugu glasanja, "za" Mišljenje Komisije glasalo je 19, "protiv" devet – svi iz RS-a, "suzdržalo" se osam poslanika.

Prema tome, usvajanjem Mišljenja, Dom je usvojio sljedeće zaključke:

- 1. Predstavnički dom zahtijeva od Upravnog odbora BHRT-a da u zakonskoj proceduri izvrši izbor konsultantske firme koja će utvrditi stvarno finansijsko stanje i procijeniti realnu imovinu BHRT-a, te na osnovu toga sačiniti plan sanacije i konsolidacije finansijskoog poslovanja BHRT-a.**
- 2. Predstavnički dom zadužuje rukovodstvo Komisije za finansije i budžet i predsjedavajućeg Upravnog odbora BHRT-a da održe sastanak s predstavnicima Vijeća ministara BiH kako bi pronašli rješenje za izlazak iz situacije u kojoj se trenutno nalazi BHRT.**

#### **Ad. 17. Izvještaj komisije Kolegija o nastojanju za postizanje saglasnosti o Prijedlogu zaključka poslanika Momčila Novakovića povodom razmatranja Informacije o aktuelnoj sigurnosnoj situaciji u BiH, s posebnim osvrtom na terorizam**

Nije bilo rasprave.

Prilikom glasanja u drugom krugu zaključak Momčila Novakovića nije usvojen. "Za" je glasalo 14, "protiv" 16, "suzdržalo" se pet poslanika.

Nakon što nije usvojen zaključak Momčila Novakovića, kojim je traženo da se Informacija vrati Ministarstvu sigurnosti BiH radi razmatranja u Vijeću ministara BiH, provedeno je glasanje o ostalim materijalima iz ove tačke.

"Za" primanje Informacije k znanju glasao je 21 poslanik (Federacija 18, RS tri), "protiv" je glasalo šest, "suzdržalo" se osam. Zbog nedostatka entitetske većine, izvršeno je usaglašavanje u Kolegiju kao komisiji. Predsjedavajući je obavijestio da je u Kolegiju postignuta saglasnost i da je Informacija primljena k znanju.

Dalje je provedeno glasanje o prijedlozima zaključaka Denisa Bećirovića (u tri tačke), Joze Križanovića i Slavka Jovičića, s po jednom tačkom. Rezultati glasanja o zaključcima su sljedeći:

- Denisa Bećirovića: "za" 19 (Federacija BiH 16, RS tri), "protiv" šest, "suzdržana" četiri. Nakon usaglašavanja, u drugom krugu "za" su glasala 23, "protiv" 10 – RS osam, "suzdržala" su se tri poslanika.
- Joze Križanovića: "za" 21 (Federacija BiH 19, RS dva), "protiv" osam, "suzdržana" tri. Nakon usaglašavanja, u drugom krugu "za" je glasalo 26, "protiv" osam – iz RS-a sedam, "suzdržana" tri.
- Slavka Jovičića: "za" 20 (Federacija BiH 10, RS 10), "protiv" šest, "suzdržalo" se devet poslanika.

Prema tome, u okviru ove tačke usvojeni su sljedeći zaključci (1.do 3. na prijedlog D.Bećirovića, 4. na prijedlog S. Jovičića i 5. na prijedlog J. Križanovića):

1. Zadužuje se Vijeće ministara BiH da, u roku od 30 dana, dostavi plan za poboljšanje provođenja strateških dokumenata i akcionih planova za borbu protiv pojedinih oblika organiziranog kriminala.
2. Zadužuje se Vijeće ministara BiH da, u roku od 30 dana, predloži konkretne mjere za realizaciju tačke 4. prijedloga mjera i radnji koji je dostavilo Ministarstvo sigurnosti BiH.
3. Predstavnički dom PSBiH će u narednih 30 dana održati posebnu sjednicu posvećenu aktuelnoj sigurnosnoj situaciji u BiH.
4. Zadužuje se Ministarstvo pravde BiH da, zajedno s Ministarstvom sigurnosti BiH, što prije pripremi izmjene i dopune Krivičnog zakona BiH, kojima će za najteža krivična djela, kao što su teroristički akti, trgovina narkotičkim sredstvima, trgovina ljudima i bijelim robljem, trgovina oružjem itd., predvidjeti maksimalne kazne propisane našim zakonodavstvom.
5. Predstavnički dom daje punu podršku radu i ohrabruje sve sigurnosne i pravosudne organe da razviju punu međusobnu saradnju i ojačaju aktivnosti u borbi protiv svih oblika kriminala u skladu sa zakonima, a posebno na pitanjima terorizma, ratnih zločina i organiziranog kriminala.

#### **Ad. 18. Izvještaj komisije Kolegija o nastojanju za postizanje saglasnosti o Prijedlogu zaključaka Kluba SDA povodom rasprave o Analizi stanja u Projektu CIPS s posebnim osvrtom na izdavanje lažnih dokumenata**

Nije bilo rasprave.

Prilikom glasanja, prijedlog zaključaka Kluba SDA nije usvojen. "Za" je glasalo 26, "protiv" 10 – svi iz RS-a, "suzdržalo" se šest poslanika.

#### **Ad. 19. Prijedlog zaključka o izradi plana aktivnosti na rješavanju smještaja institucija BiH (prijedlog poslanika Huseina Nanića sa 40. sjednice, održane 19.11.2008.)**

U uvodnim napomenama predsjedavajući je podsjetio da je ova tačka u dnevni red uvrštena na prijedlog poslanika Huseina Nanića, podnesen na prošloj sjednici. Obavijestio je poslanike da je Prošireni kolegij raspravljao o problemu smještaja poslanika i službi u zgradi Parlamentarne skupštine BiH te da je dogovoreno da, u okviru ove tačke, predloži zaključak kojim će pozvati Vijeće ministara BiH da oslobodi prostorije Parlamentarne skupštine BiH.

Nije bilo rasprave o ovoj tački dnevnog reda.

Prilikom glasanja, Dom je jednoglasno (37 glasova – Federacija BiH 25, RS 12) usvojio zaključak koji je predložio Husein Nanić.

Sa 35 glasova "za" (Federacija BiH 23, RS 12) i jednim "suzdržanim", usvojeni su i zaključci koje je predložio Prošireni kolegij.

Prema tome, u okviru ove tačke usvojeni su sljedeći zaključci – zaključak pod tačkom 1. na prijedlog H. Nanića, a ostali na prijedlog Proširenog kolegija:

1. Predstavnički dom Parlamentarne skupštine BiH zadužuje Vijeće ministara BiH da, uz Zakon o Budžetu institucija BiH i međunarodnih obaveza BiH za 2009. godinu, dostavi i Program/plan aktivnosti na rješavanju smještaja institucija Bosne i Hercegovine.
2. Iscrpljene su sve mogućnosti daljnjih razgovora i dogovora s Vijećem ministara BiH u vezi sa oslobađanjem prostorija u zgradi Parlamentarne skupštine BiH, s obzirom da Vijeće ministara BiH nije ispoštovalo ni posljednji rok dat da se to uradi.
3. Poziva se Vijeće ministara BiH da do 1.januara 2009. oslobodi sve prostorije u zgradi Parlamentarne skupštine BiH, osim prostorija na III. spratu koji je odobren Vijeću ministara BiH.
4. Zadužuje se sekretar Zajedničke službe da izda rješenja o useljenju u sve prostorije, osim III. sprata, i da se u njih, prema utvrđenom rasporedu, usele komisije, klubovi poslanika i službe Parlamentarne skupštine BiH.

Ovim je realiziran dnevni red 41. sjednice.

Sjednica je završena u 19,20 sati.

Sastavni dio Zapisnika je transkript 41. sjednice.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Niko Lozančić**